

Datum: 21.06.2018.

Broj: 02-06/730

Parlamentarci iz FBiH podržali prijedlog kojim se sprečava borba protiv korupcije

Posebno zabrinjava to što su poslanici Predstavničkog doma Parlamenta FBiH, i pored stalnog isticanja da smatraju veoma bitnim borbu protiv korupcije, podržali prijedlog kojim se ukidaju pretpostavke za krivični progon korupcije.

Banjaluka, 21. juni 2018. – Predstavnički dom Parlamenta FBiH usvojio je u skraćenom postupku **Prijedlog zakona o izmjeni i dopuni Krivičnog zakona FBiH** kojim se mijenja jedan od oblika krivičnog djela Primanje nagrade ili drugog oblika koristi za trgovinu uticajem, a kojim je inkriminisano protivzakonito posredovanje. Prijedlogom koji je u skraćeni zakonodavni postupak uputila poslanica Elzina Perić faktički se briše teži oblik ovog krivičnog djela, a kojim je kriminalizovana situacija kada počinitelj koristeći se svojim službenim ili društvenim položajem, ili uticajem, posreduje da se izvrši ili ne izvrši neka službena ili druga radnja. Spornim prijedlogom predviđa se da je neophodno da se uz posredovanje zahtijeva ili primi mito, ili obećanje mita za sebe ili drugog. Na ovaj način se sužava kriminalna zona u odnosu na jedan od oblika trgovine uticajem, te se otklanjaju zakonske osnove za krivični progon političke korupcije i najtežih oblika kriminaliteta.

Transparency International u BiH (TI BiH) podsjeća da je u svom Izvještaju iz prošle godine Grupa zemalja za borbu protiv korupcije (GRECO) pozdravila to što je Krivičnim zakonom FBiH propisan posebni oblik trgovine uticajem, a koji se odnosi na protivzakonito posredovanje. Prijedlogom koji je u skraćeni postupak uputila poslanica Elzina Perić stvara se opasnost da se poništi ovo dostignuće, i da se unazadi zakonodavni okvir koji se odnosi na borbu protiv korupcije. Posebno zabrinjava to što su poslanici Predstavničkog doma Parlamenta FBiH, i pored stalnog isticanja da smatraju veoma bitnim borbu protiv korupcije, podržali prijedlog kojim se ukidaju pretpostavke za krivični progon korupcije. U javnosti su se pojavile opravdane sumnje da će se upravo brisanjem jednog oblika krivičnog djela korupcije pogodovati licima kojima se trenutno sudi u nekim od najvećih predmeta, kao što je predmet Nezakonita zapošljavanja protiv Amira Zukića i ostalih. I to tako što im se usvajanjem ove izmjene više neće moći suditi za djela koja im se stavljaju na teret.

TI BiH poziva poslanike Predstavničkog doma da ne usvoje sporne izmjene, a poslanicu Elzinu Perić da povuče istu, ali i Vladu FBiH i Federalno ministarstvo pravde da upozore poslanike na ozbiljnost posljedica koje bi mogle nastati usvajanjem izmjena kojima se zapravo dekriminalizuje teži oblik trgovine uticajem. Ukoliko bi se ove izmjene usvojile, Parlament FBiH bi pokazao da mu je cilj onemogućiti borbu protiv korupcije.